

■ MOHD. AZRUL AZLEN ABD. HAMID

## ANALISIS UHUD (Bahagian 3)

# Dilema antara Kepatuhan dan Keghairahan

Siri I-Pods yang lalu membincangkan peperangan awal yang berlaku antara tentera Islam dan tentera musuh di mana kita dapat melihat keberanian luar biasa yang ditunjukkan oleh tentera Islam.

I-Pods kali ini akan membawa anda meneroka perjalanan peperangan yang berlaku serta menjelaskan sebab utama kekalahan tentera Islam di dalam peperangan ini.

### “Peperangan sebenar sudah bermula... Allahuakbar!”

Ketika peperangan secara rasminya bermula, kelihatan tentera Islam mula menyerbu tentera musuh sambil melaungkan “Amit, amit!” (bunuh, bunuh!). Kemaraan mereka disertai dengan roh keimanan lalu tampil bersemangat merempuh barisan tentera musuh umpama ombak yang menghempas benteng-benteng di hadapannya.

Abu Dujanah, salah seorang contoh tentera Islam masuk ke dalam peperangan dengan semangat membara sambil berkata:

“Akulah orangnya yang dijanjikan kekasihku. Tatkala kami di al-Safah di rimbunan palma. Bahawa selamanya aku tidak akan mundur ke belakang. Aku melibas pedang Allah dan Rasul.”

### Abu Dujanah dan Hindun binti Utbah

Abu Dujanah yang bersemangat tinggi mula menyerbu dan mengucar-nagcirkan barisan pertahanan musuh sehingga dia bertemu dengan seseorang yang tidak disedariinya seorang wanita, yang merupakan ketua wanita Quraisy. Kata Abu Dujanah:

“Aku melihat seorang manusia yang sedang mencakar-cakar dan mengherdik manusia. Lalu aku menuju ke arahnya.

Apabila aku mengangkat pedangku untuk menamatkan riwayatnya, dia pun berpaling, lalu aku dapati dia seorang wanita! Maka aku menghormati pedang Rasulullah s.a.w agar tidak digunakan untuk menetak wanita.”

Zubair bin al-Awwam pula berkata: “Aku melihat Abu Dujanah mengangkat pedangnya untuk dihentakkan ke leher Hindun binti Utbah, kemudian ditarik balik pedangnya, lalu aku berkata: ‘Allah dan Rasul-Nya yang lebih mengetahui mengapa dia tidak jadi membunuohnya.’” (Rujuk Ibn Hisham, 2/69)

### Terkorbannya Singa Allah

Hamzah bin Abdul Mutalib bertarung dengan keberanian seperti seekor singa. Antara keberanian yang ditunjukkan Hamzah:

- Berada di barisan paling hadapan dalam pejuang tentera Islam dan merupakan antara tentera yang paling menonjol keberaniannya.

- Menyerbu ke dalam barisan pertahanan musuh dan berjuang dengan beraninya sehingga jaguh-jaguh musuh gugur bagaikan dedau yang gugur bertaburan.

- Menghapuskan pemegang bendera musuh.

Namun begitu, takdir telah menentukan beliau terkorban dalam peperangan tersebut. Hamzah telah dibunuh curi oleh Wahsyi bin Harb yang berselindung di sebalik sekutu batu. Kata Wahsyi:

“Lalu aku bersedia melontarkan lemingku, sehingga apabila aku yakin benar sasarannya, maka aku pun terus melontarkannya ke arah Hamzah. Lontaranku itu tepat mengenai perutnya sehingga tali perutnya terburai.” (Sahih al-Bukhari, 2/583)

### “Kita menang!” (Peringkat permulaan perang)

Ketika ini tentera Islam yang mempunyai bilangan tentera yang agak kecil berbanding tentera musuh telah berjaya menguasai semua lokasi di medan pertempuran sehingga telah menyebabkan barisan pertahanan tentera musuh mula berkecamuk. Keadaan

ini tidak ubah seperti 3000 tentera musuh menentang 30,000 tentera Islam. Ini adalah kerana keadaan tentera Islam yang mempamerkan keberanian dan keyakinan mereka yang tinggi dalam peperangan ini.

Keadaan kekalahan tentera musuh pada peringkat ini digambarkan seperti berikut:

- Tidak ada seorang pun daripada mereka yang berani untuk mengambil bendera yang jatuh ke bumi setelah terkorbannya Sawwab. Ini adalah kerana mereka merasakan mereka sudah tidak berupaya lagi untuk menentang tentera Islam.

- Mereka mula berundur untuk melarikan diri dengan meninggalkan lokasi markas mereka. Abdullah bin Zubayr meriwayatkan daripada bapanya: “Demi Allah, aku terlihat betis Hindun binti Utbah dan wanita-wanita yang bersamanya lari bertempiaran sambil menyingsing kain mereka.” (Ibn Hisham, 2/77)

- Mereka telah meninggalkan senjata dan harta yang kemudiannya dirampas oleh tentera Islam.

### “Eh, harta rampasan, apa lagi yang nak ditunggu, mari kita ambil!”

Ketika tentera Islam dilihat akan memenangi peperangan Uhud ini sepertimana kemenangan dalam peperangan Badar, sebahagian besar anggota pasukan pemanah di atas Bukit Uhud telah melakukan satu kesilapan besar yang akhirnya telah mengubah situasi peperangan kepada kekalahan.

Sebelum itu, Rasulullah s.a.w. telah mengarahkan agar pasukan pemanah

|                               |                                                                                               |
|-------------------------------|-----------------------------------------------------------------------------------------------|
| <b>Anggota pemanah:</b>       | “Harta rampasan, harta rampasan, kawan-kawan kita telah pergi ke sana, apa yang kamu tunggu?” |
| <b>Ketua pasukan pemanah:</b> | “Lupakah kamu apa yang diarahkan oleh Nabi s.a.w. kepada kamu?”                               |
| <b>Anggota pemanah:</b>       | “Demi Allah, kami akan turun kepada mereka dan sama-sama kecapi harta rampasan itu.”          |

Riwayat al-Bukhari daripada hadis al-Barra' bin 'Azib, 1/426.

terus bertahan di atas bukit walau apa pun yang berlaku. Sayangnya, apabila melihat tentera Islam yang lain sibuk mengaut harta rampasan pihak musuh, sebahagian anggota pasukan pemanah yang terpengaruh dengan kecintaan dunia bertindak turun.


Diriwayatkan bahawa 40 orang anggota pemanah turun dari bukit itu dan menyertai mereka yang lain untuk mengumpulkan harta rampasan. Maka benteng pertahanan mereka telah terdedah kepada serangan tentera musuh, kerana yang terus berada di atas bukit tersebut hanyalah Abdullah bin Jubayr dan sembilan anggota yang lain.

Kesan lain akibat kesilapan tersebut adalah:

- Membawa kerugian besar kepada tentera Islam dan hampir-hampir meragut nyawa Nabi s.a.w.
- Meninggalkan kesan buruk terhadap nama baik tentera Islam serta kehebatan yang mereka peroleh dalam Perang Badar.

### **"Ini peluang keemasan, mereka sedang asyik dengan harta rampasan. Mari kita serang!"**

Tatkala melihat sebahagian tentera Islam yang sedang asyik mengumpulkan harta rampasan perang, Khalid al-Walid (pada ketika itu belum memeluk Islam) dengan pantas berpatah balik sehingga sampai ke barisan pertahanan tentera Islam yang terakhir.



■ Pergerakan serangan dari belakang yang diketuai oleh Khalid al-Walid

Khalid dan tenteranya telah menyerbu tentera Islam dari arah belakang. Anggota berkudanya berteriak dengan satu teriakan yang menyedarkan tentera Musyrikin agar berpatah balik ke arah tentera Islam. Akhirnya mereka berkumpul semula untuk menentang

#### **Mohd Azrul Azlen Abd Hamid**

Lulusan Ijazah Sarjana Muda di UIAM dan Ijazah Sarjana (MA) dalam bahasa Arab juga di UIAM, dan sedang menyambung pengajian peringkat Ph.D di Universiti Malaya. Kini sebagai pensyarah di UIAM.

Boleh dihubungi di: mohdazrulazlan@gmail.com.

tentera Islam dan mula mendapatkan kekuatan untuk bertempur semula. Tentera Islam mula terkepung dari depan dan belakang dan mereka terjebak dalam kepungan di antara dua barisan musuh.

### **"Kita telah dikepung!"**

Ketika tentera Islam dikepung, sebahagian mereka mula hilang arah dan apa yang mereka fikirkan hanyalah untuk menyelamatkan diri masing-masing. Antaranya:

- meninggalkan medan perang tanpa mengetahui risiko yang bakal mereka hadapi.
- melarikan diri pulang ke Madinah.
- berlari naik ke atas bukit.

■ berpatah balik lalu bercampur baur dengan tentera musuh sehingga tidak dapat dibezakan yang mana satu kawan dan yang mana satu lawan.

### **"Nabi diserang, lindungi Nabi!"**

Ketika tentera musuh berjaya mengepung Nabi s.a.w., mereka dengan raksusnya menyerang Rasulullah s.a.w. sehingga Baginda tercedera. Antara kecederaan yang dialami oleh Baginda s.a.w.:

- Gigi hadapan kiri dan kanan Baginda patah dan tercedera akibat dipanah oleh Utbah bin Abi Waqqas.
- Luka di bahagian bibir bawahnya akibat dipanah oleh Utbah bin Abi Waqqas.
- Luka di bahagian dahi akibat dipukul oleh Abdullah bin Shihab al-Zuhri.
- Luka pada bahagian bahu akibat dipukul oleh seorang pahlawan kuda yang bengis.
- Luka pada pipinya akibat pukulan yang kuat.

Melihat Nabi s.a.w. tercedera, para sahabat telah membuat pagar di sekeliling Baginda dengan senjata dan tubuh mereka sendiri. Mereka melindungi Baginda daripada pukulan dan serangan musuh serta memberikan perlindungan yang rapi.

### **"Jangan menyerah kalah, mari kita pertahankan Nabi dan agama!"**

Walaupun seperti sudah berada di ambang kekalahan, namun tentera Islam telah menunjukkan semangat keperwiraan dan pengorbanan yang hebat, yang tidak ada tolak bandingannya. Antara mereka adalah:

#### **Abu Talhah**

Menggunakan tubuh badannya sendiri untuk memagari Rasulullah s.a.w. dan mengangkat dadanya untuk melindungi Baginda daripada panahan musuh.

#### **Abu Dujanah**

Berdiri di hadapan Rasulullah s.a.w. sambil membentengi Baginda dengan belakang badannya.

#### **Hatib bin Abi Balta'ah**

Mengekor 'Utbah bin Abi Waqqas yang telah mematahkan gigi Nabi s.a.w., lalu dilibas pedangnya sehingga terpenggal leher 'Utbah.

Merampas kuda dan pedang 'Utbah.

#### **Sahl bin Hanif**

Memberikan baiah kepada Nabi s.a.w. untuk sanggup mati.

#### **Abd Rahman bin Awaf**

Berjuang bermati-matian sehingga mendapat kecederaan pada mulut di mana gigi-gigi hadapannya tertangkal.

#### **Mus'ab bin 'Umair**

Berjuang mempertahankan Nabi s.a.w. daripada serangan Ibn Qam'i'ah.

#### **Kesimpulan**

Begitulah situasi peperangan yang berakhir dengan kekalahan tentera Islam. Namun begitu, kekalahan ini telah memberikan pengajaran yang amat bermakna buat umat Islam agar sentiasa mematuhi perintah dan arahan pemimpin terutamanya daripada pemimpin agung kita Rasulullah s.a.w. Oleh sebab itu, kekalahan bukanlah untuk diratapi, tetapi perlu dikaji, dihayati serta dimuhasabahkan agar tidak mengulangi kesilapan lalu, iaitu merancang perjalanan ke arah sebuah kejayaan yang bermakna. S

## **JAWAPAN TRIVIA**

Jika peperangan Badar sinonim dengan angka 313 yakni jumlah tentera Muslim yang terlibat, peperangan Uhud pula sinonim dengan angka **7, 70** dan **700**. Apakah kaitan tersebut?

> Lihat jadual di bawah.

| <b>Angka 7</b>                                                                           | <b>Angka 70</b>                                                                                  | <b>Angka 700</b>                                                                                       |
|------------------------------------------------------------------------------------------|--------------------------------------------------------------------------------------------------|--------------------------------------------------------------------------------------------------------|
| Panjang Bukit Uhud adalah <b>7km</b> .                                                   | <b>70</b> orang sahabat gugur syahid dalam peperangan ini.                                       | Bilangan tentera Islam: <b>700</b> orang. Pada asalnya jumlah tentera Islam adalah seramai 1000 orang. |
| 5 ekor unta dan 2 ekor kuda turut serta dalam peperangan ini.<br>Jadi <b>5 + 2 = 7</b> . | <b>70</b> orang tentera Musyrikin terbunuh dan <b>70</b> orang lagi ditawan oleh tentera Muslim. | Diriwayatkan bahawa <b>700</b> baju besi dijadikan sebagai senjata perlindungan oleh pihak musuh.      |